

## Ikalaata ilya Paulo ku Bhafiliipi Uwandilo

Inhaaya iya Filiipi yáamile mu Makedoniya, kumbaligamba mu nsi iya Wugiliiki. UPaulo álumbiliye kukuula (Mbombo zya Bhasundikwa 16) na kwanda ishíhanza. Heelo we gaashila amanha, uPaulo ákungilwe mwi jeela. Ishíhanza isha mu Filiipi shámutwaliye inhela. Asimbile ikalaata ili kubhasalifwa kúnongwa iya kumutwalila.

Khabhili mwi kalaata ili akubhabhúzya aBhakilisiti kuti atakúsaajila kufwa. Akubhagomwa kwimiilila ku makha mu lwitikho inga bhakubhayimvwa. Akubhakumbúsyá kuti uwuumi waabho mwa Kilisiti shikunjilwa she uMúlungu abhapiye.

### **Zye zili mu shitaabu ishi**

UPaulo akubhalamúkha aBhafiliipi

Akubhabhúzya intumi na mayimba ge áamile nago

Akubhabhúzya kulekha imbombo iyi njendo izyi maandi,

UPaulo akubhasalifwa vwe bhámupiiye

### *Indamúkho*

<sup>1</sup> Ine ne Paulo peeka nu nholo wítu mu lwitikho uTiimoti, tubhabhombi bha Yeesu Kilisiti. Tukubhasimbila mubhafinjile\* mwenti

\* **1:1** 1:1 Mubhafinjile Bhaazya abhafinjile mu Wilulanyo uwa mazwi amajeni.

mwe mupatinhiine nu Yeesu Kilisiti, mwe mūli mā nhaaya iya mu Filiipi, peeka na bhimiilili na bhaavwi abha shibhanza. <sup>2</sup> ƳTaata wiitu ƳMūlungu nū Mwene uYeesu Kilisiti bhabhalole-laje uwiila, na kũabhapa uwutengaanu.

*ƳPaalo akubhapuutila aBhakilisiti abha mu Filiipi*

<sup>3</sup> Inkumusalifwa ƳMūlungu waani kũongwa yiinyu akhabhalilo khonti khe nabhakũmbũkha. <sup>4</sup> Akhabhalilo khokhonti khe inkũbhalaabhila imwe mweni kwa Mūlungu, inkupuuta kũ lũseshelo. <sup>5</sup> Kwandila isiku lye mwĩtishile, makũnaavwa we inkũlũmbiilila iNtumi iNyinza izya Yeesu Kilisiti kufuma isiku ilya kwanda kufishila akhabhalilo ikha. <sup>6</sup> Imanyile nalyoli kuti, ƳMūlungu we áyandile imbombo iny-inza iya wuposhi mukaasi yiinyu, atijendeelele kũyikwilizya kufishila pi siku liila lye uYeesu Kilisiti akhayigalũkha. <sup>7</sup> Yikhondeeye kũkwani kũbhasibhiilila shiniisho imwe mweni, kũongwa ye imbaganile nhaani. Ye nongwa kũ khabhalilo ikha khe inkungiiilwe na khabhalilo akha palũsalo khe intakungiiilwe, imwe mweni munavwizye kũvwinsya na kwimila iNtumi iNyinza mu wiila wa Mūlungu we ambishiye kũlolesya uwanalyoli. <sup>8</sup> ƳMūlungu we azi-manyile ziniizi zye inkũlonga kuti nalyoli in-sambile nhaani kũbhalola winza imwe mweni, kũongwa ye imbaganile anza she uYeesu Kilisiti abhaganile.

<sup>9</sup> Inkũlaabha kwa Mūlungu kuti ulugano lwinyu lajendeelele kwonjela nhaani, peeka

na kubha ni njeele nu wumanyi uwa nalyoli,  
<sup>10</sup> inga muzimanye na kubhomba zye nyinza  
 nhaani. Ipo pe mutibhe ni njendo inyinza  
 sita mbiibhi naazimo kufishila isiku liila lye  
 uYeesu Kilisiti akhayigalukha winza. <sup>11</sup> UYeesu  
 Kilisiti wuuyo we atibhavwaje kujendeelela  
 kubhabhombela abhanji izya wugolosu, inga  
 uMulungu ayimishilwaje na kupaalwa.

*Uwinza wa mayimba aga kukungwa uPaulo*

<sup>12</sup> Ishi bhanholo bhaani mu lwitikho,  
 inkwanza mumanye kuti amayimba iga  
 aga kukungwa, gavwizye nhaani kuvwinsya  
 iNtumi iNyinza. <sup>13</sup> Kufumilana na ganaago,  
 abhalindiilili bhonti abhi nyumba iya wumwene  
 uwa Shiluumi peeka na bhantu abhanji  
 bhonti abha panaapa, bhamanyile kuti  
 inkungiilwe kunongwa iya kulumbiilila izya  
 Kilisiti. <sup>14</sup> Khabhili kukungwa kwani kunuuku,  
 kubhavwizye abhanholo mu lwitikho abhinji  
 kubha bhadandamazu mwa Mwene uYeesu.  
 Abheene bhakwonjela nhaani kulumbiilila  
 intumi zya Mulungu sita lyoga. <sup>15</sup> Bhaliipo  
 abhamwabho bhe bhakulumbiilila intumi zya  
 Kilisiti kunongwa ye bhakundolela umwone,  
 khabhili bhakwanza kufuuyana niine. Ileelo  
 bhamu bhakulumbiilila intumi zya Kilisiti ku  
 nsiibho inyinza. <sup>16</sup> Ibha bhakumulumbiilila  
 ku lagano, kunongwa ye bhamanyile kuti  
 uMulungu ampriye imbombo iya kwimila iNtumi  
 iNyinza. <sup>17</sup> Ileelo abhamwabho bhakulumbiilila  
 intumi zya Kilisiti kwi dala ilya kuyibaada, te  
 ku mwoyo uwa wugolosu. Bhakusiibha kuti

kubhomba shiniisho bhatinonjezye amayimba  
ma wakungwe waani.

<sup>18</sup> Liniilyo litakunanganya naakhamu! Ine inkuseshela inga abhantu bhakumulumbiilila uKilisiti ka madala aminji, yibhe ku nkwinno imbiibhi awe ku nkwinno inyinza. Khabhili intijendeelele kuseshela nhaani, <sup>19</sup> kunongwa ye manyile kuti, ka ziniizyo zye zinaajile, intitulwe ku mpuuto zyinyu na ka makha ga Mupepu wa Yeesu Kilisiti. <sup>20</sup> Inkwino yaani impiti, na lusubhilo lwani ka kuti kwi dala lyolyonti, te insupile kumusubhila uKilisiti, lyoli intijendeelele kubha na mwoyo uwa wudandamazu ma tubhalilo twonti, inhaani ma khabhalilo ikha. Inkubhomba shiniishi inga ma wikhalo waani wonti, we ne mwumi awe inga naafwa, uKilisiti apalwaje. <sup>21</sup> Ishi kukwani, kubha ne mwumi ka kunongwa iya kumubhombela uKilisiti, na kufwa kwe kwiza nhaani. <sup>22</sup> fleelo inga inkujendeelela kubha ne mwumi, intilole inyinza zye zikufumilana ni mbombo yaani. Intakumanya lye lyanza nhaani. <sup>23</sup> Pe indi panaapa, indemiilwe na gabhili. Inkusungukha kufwa inga imbale kwikhala peeka nu Kilisiti. Liniili lye lyanza nhaani. <sup>24</sup> fleelo ilyinza nhaani kukwinyu li liili ilya kuti injendeelele kubha ne mwumi. <sup>25</sup> Kunongwa ye ine inkusubhila ziniizi, manyile kuti intijendeelele kubha ne mwumi. Inhayibha peeka nimwe mwenti, inga mugome na kubha na luseshelo ma lwitikho. <sup>26</sup> Khabhili mutijendeelele kubha ni togo kwi dala ilya kapatinhana nu Yeesu Kilisiti,

kunongwa ya kwinza kwani kukwinyu kubha peeka nimmwe winza.

<sup>27</sup> Lye likwanziwa nhaani ku kuti, injendo zyinyu zikholanaje ni manyizyo zyi Ntumi iNyinza izya Yeesu Kilisiti. Inga niza kukwinyu awe inga napootwa kwinza, inhimvwaje kuti muyisindile akhinza mu nsibho yeeka nu mwoyo weeka kulwila ulwitikho lwe lukufumilana ni Ntumi iNyinza. <sup>28</sup> Khabhili matabhogopaje abhaluga bhiinyu, lyoli mabhanje mwe bhadandamazu insiku zyonti. Liniili lye shilolesyo isha kusimishizya kuti uMlungu akhayibhayazya. Heelo kukwinyu imwe shilolesyo sha wuposhi we wukufuma kwa Mlungu. <sup>29</sup> Inkulonga shiniishi kunongwa ye uMlungu abhapiye imwe uwiila, te kumwitikha uKilisiti kwene, lyoli na kuyimba kunongwa ye mumwitishile. <sup>30</sup> Mwalolile palusalo she nayimbile, akhabhalilo ikha makujendelela kwimvwa amayimba gaani. Ishi nimmwe makuyimba anza shisho.

## 2

### *Uwutimvu na wupiti wa Kilisiti*

<sup>1</sup> Uwikhalo wiinyu mwa Kilisiti wakuubhapa amakha, nu lugano lwakwe lukubhainjizya. Muli nu wupeeka mwa Mupepu uMufinjile, makulolelana ishisa na kubha nu wutonsu. <sup>2</sup> Ishi makwilizyaje uluseshelo lwani, kwi dala ilya kubha nu lwimvwano, ulugano, umwoyo weeka, ni nsibho yeeka.

3 Mubhombaje naalimo ku mwoyo uwa wulumanyi awe ku mabaado. Mubhanje nu wushindamu muneemwe na muneemwe, weeka weeka amwenyaaje uwamwabho kuti akhonde-eye kushila uweene wuuyo. 4 Umuntu wowonti aleshe kusaajila zyi zyakwe, lyoli ayanzaje kwavwa abhanji. 5 Mubhanje ni nsiibho yiniyo ye amile nayo uYeesu Kilisiti.

6 She poope uweene amile wa Mulungu, atakhalola kuti kubha wa Mulungu, khantu kha kulemelela ku makha.

7 Lyoli ku shigane shaakwe wuuyo, akhawulekha uwumwamu waakwe, akhayibhikha ngati atali nu wumwamu naawumo.

Akhabha mutumwa, akhapaapwa anza bhantu abhanji.

8 Akhayiisya na kutinikha, poope akhafwa uwufwe uwa pa shikhobhenhanyo.\*

9 Kunongwa yiniyo, uMulungu akhamuzvwa nhaani, akhaamupa itaawa ipiti kushila amataawa gonti.

10 UMulungu abhombile shiniisho, inga uYeesu abhe nu lushindikho.

Khabhili ivipelwa vwonti ivwa kumwanya kwa Mulungu, ivwa mu nsi ni vwa kwilongo,†

---

\* 2:8 2:8 Uwufwe uwa pa shikhobhenhanyo Ku Bhayahuudi na ku Bhaluuni uwufwe uwa pa shikhobhenhanyo wamile wa bhantu bhe bhahombile imbiibhi nhaani. † 2:10 2:10 Kwilongo Bhaazya mu Wilulanyo uwa mazwi amajeni.

visugamile pilongolela yaakwe kumupuuta.

- <sup>11</sup> Khabhili umuntu weeka weeka  
 ayiitishe pa mbimbili kuti,  
 uYeesu Kilisiti wu Mwene,  
 ku wumwamu wa Taata uMwungu.

*Inhozyo izyi nsi zyonti*

<sup>12</sup> Ishi bhaganwa bhaani, we naamile peeka niimwe, mwálolesiizye ulutinikho lwinyu kukwani. Akhabhalilo ikha khe indi ukutali niimwe, mujendeelele kubha nu lutinikho. Mubhombaje zye zikhondeeye kubhombwa na bhantu bhe uMwungu abhaposhile. Mubhombaje shiniisho ku lyoga na khantentemwi. <sup>13</sup> Kunongwa ye uMwungu wuuyo akubhomba imbombo mukaasi yiinyu, na kubhapa amakha aga kugana na kubhomba zye akusiibha wuuyo.

<sup>14</sup> Mubhombaje zyonti sita kuyibhuna na sita madali, <sup>15</sup> inga mubhe mwe bhantu mwe mutali ni mbiibhi naazimo. Mubhanje mwe bhaana abhagolosu abha Mwungu bhe bhakwikhala mu nsi iya bhantu abhabhiibhi bhe bhateejile. We mukwikhala mu nsi, imwe mwe lukhozyo ku bhantu bhanaabho ku njendo inyinza anzi nzota she zikulamwa ku mabingo. <sup>16</sup> Mulemaje izwi lya wuumi. Ipo pe niine intilyaje idala ilya kuyibaadila pi siku liila lye uKilisiti akhayigalukha, kunongwa ye yikhayilolekha apazelu kuti kuyikungula kwani ni mbombo yaani kutateejile pabhulo.

<sup>17</sup> Kwi dala ilya kumwitikha uKilisiti, imwe mwáyifumwizye ngati mfinjile kwa Mwungu.

Pe shiniisho niine inga bhangoga kubha ngati mfinjile kunongwa ya Kilisiti, intiseshele na kushimwa peeka niimwe. <sup>18</sup> Niimwe shiniisho mukwanziwa kuti museshelaje, na kushimwa peeka niine.

*UPaulo akubhasonteelezya uTiimoti nu Epafuladito*

<sup>19</sup> Inga uMwene uYeesu ayigana, inkusubhila kumusonteelezya uTiimoti kukwinyu shiniishi bhulo, inga niine injinjile umwoyo, we nimvwa she mukujendeelela. <sup>20</sup> Kunongwa ye intali nu muntu uwunji we akubhasaajila anzu weene. <sup>21</sup> Abhanji bhonti bhakwanza kubhomba imbombo zyahho bhobho bheene, sita kubhomba zye uYeesu Kilisiti akwanza. <sup>22</sup> Imwe maneemwe mumanyile uwudandamazu ni njendo inyinza izya Tiimoti, kuti abhombile imbombo iya kulumbiilila iNtumi iNyinza peeka niine, anzu mwana we akubhomba imbombo nu yise waakwe. <sup>23</sup> Ishi inkusubhila kumusonteelezya kukwinyu nalubhilo, we naamanya zye zitinaaje kufumilana na kukungwa kwani. <sup>24</sup> Niine inkumusubhila uMwene uYeesu kuti, nuneene intiyinze kubhayaatila shiniishi bhulo.

<sup>25</sup> fleelo inkulola yikwanziwa kumusonteelezya uEpafuladito kukwinyu, uwamwitu we akubhomba imbombo peeka niine, umusikaali mu lwitikho peeka niine. Khabhili mwamusonteleziizye kukwani, inga anaavwe vwe imbuliilwe. <sup>26</sup> Wooke asambile nhaani kubhalola imwe mweni, azyugunhiine

nhaani kunongwa ye mwimvwizye kuti aabhinile. <sup>27</sup> Nalyoli aabhinile nhaani, aapululiye kufwa. Heelo uMwungu anza amulolela ishisa, te wuuyo mwene khaala, lyoli niine bhulo aandoleeye ishisa, inga intazyugunhane nhaani. <sup>28</sup> Ishi injikunguuye nhaani kumusonteelezya kukwinyu nalubhilo, inga we mwamulola, mukhaseshele winza, nu wuzugunhanu waani weepe. <sup>29</sup> Mumuposheelee kwi taawa Iya Mwene uYeesu ku luseshelo lwonti. Mukwanziwa kubhashindikha abhantu bhe bhali anza wununu. <sup>30</sup> Uweene apalamiye kufwa kunongwa iya kubhomba imbombo ya Kilisiti. Ayilinganyiine kufwa inga ayinze kunaavwa ivintu vwe mwapotilwe kwinda kumpa muneemwe.

### 3

#### *Injendo izya wusunde uwa nalyoli*

<sup>1</sup> Ishi bhanholo bhaani mu lwitikho, inkubhabhuzya kuti, museshelaje kubha peeka na Mwene uYeesu. Intakulita kugalushila kubhasimbila amazwi gagaala ge nabhasimbiye palusalo, kunongwa ye ganaago gatiyonjezye kulindiilila ulwitikho lwinyu.

<sup>2</sup> Mubhe amiiso na bhabhomba mbiibhi, bhe bhali ngati mbwa, bhe bhakusundiilila kulema aminho aga kuti kuwaaga uwuposhi yikuti utahiiliwe.\* <sup>3</sup> Itwe twe bhantu bha

---

\* **3:2** 3:2 Utahiiliwe Kutahiiliwa yamile shiholesyo mu mubhili kulolesya ulufingo Iwa Mwungu na bhantu bhaakwe. Bhaazya kutahiili mu Wilulanyo uwa mazwi amajeni.

Mulungu twe tutahiliilwe iya nalyoli, abheene khaala. Inkulonga shiniisho kunongwa ye itwe tukumupuuta uMulungu kwi dala ilya Mupepu waakwe na kulola itogo kunongwa ye tupat-inhiine nu Yeesu Kilisiti. Itwe tutakubhikha ulusubhilo lwitu mu vintu ivwa mu nsi kuti vingatupokha. <sup>4</sup> Heelo niine bhulo naamile ingasubhila ziniizyo izya mu nsi.

Inga aliipo umuntu we akusiibha kuti angakhola kusubhila ziniizyo izya mu nsi, ine imushilile. <sup>5</sup> Ine natahiliilwe we indi ni nsiku naane kufuma kupaapwa kwani. Ine ne Mwisilaeli uwa mu shikholo sha Benjamiini, Muebulaniya uwa kupaapwa. Ku zya kalema indajizyo zya Bhayahuudi, ine naamile ne Mufalisaayi.† <sup>6</sup> Khabhili inhayifumwaga nhaani kuyimvwa ishibanza.‡ Ku zya wugolosu we wukufumilana na kulandata indajizyo, naamile ne mugolosu, sita nongwa naayimo.

<sup>7</sup> Heelo zyonti zye inhazilolaga kuti zikunaavwa, ishi inkuzilola kuti zitakunaavwa naakhamu, kunongwa iya kumwitikha uKilisiti. <sup>8</sup> Nalyoli te ziniizyo nyeene khaala, lyoli inkuzilola zyonti kuti zitakwavwa naakhamu, kunongwa ya winza uwa kumumanya nhaani uYeesu Kilisiti, uMwene waani. Kunongwa ya Yeesu wanuuyo, initishile kuvilekha vwonti. Inkuvilola vwonti viniivwo ngati mavi inga

---

† **3:5** 3:5 UMufalisaayi Bhaazy aBhafalisaayi mu Wilulanyo uwa mazwi amajeni. ‡ **3:6** 3:6 Inhayifumwaga nhaani kuyimvwa ishibanza UPaulo we ashili kupindikha, akhasiibhaga kuti we akubhayimvwa aBhakilisiti akubhomba mbombo ya Mulungu. Bhaazy Mbombo zya Bhasundikwa 8:1-3; 9:1-2; 22:4; 26:9-11.

imumanye akhinza uKilisiti. <sup>9</sup> Naani indoleshe pilongolela yaakwe, inga intayibhiikhaje nuneene kuti inhondeeye pamiiso ga Mlungu kwi dala ilya kulema indajizyo. Lyoli inkukhondela pamiiso ga Mlungu kwi dala ilya kumwitikha uKilisiti, kukhondela kwe kukufuma kwa Mlungu, kwe kukufumilana nu lwitikho. <sup>10</sup> Akhantu khe inkwanza, ku kumumanya uKilisiti, kulola amakha aga kuzyukha kwakwe, kuyimba anza she uweene ayimbile, na kufwa kwani kukholane na kufwa kwakwe. <sup>11</sup> Kumo inkusubhila kuti niine we naafwa, uMlungu akhanzyusye.

### *Kujimbiilila inga tufishile uwugolosu*

<sup>12</sup> Intakuyibaada kuti imfishile, awe kuti nabha ne mugolosu, ndaali. Lyoli ine uKilisiti ansabhaye, ye nongwa inkuyikungula kumulandata inga imfishile kuposheela insupo ye kunongwa ya yiniyo uYeesu Kilisiti anaajile. <sup>13</sup> Bhanholo bhaani mu lwitikho, intakuyibhaazya kuti imfishile, lyoli inkubhomba lyeka lyene, inkuzilekha zye zishilile kulusalo, inkushimbiilila zye zili kwilongolela yaani. <sup>14</sup> Inhambiye kujenda inga imfishe kumpeleela, imposheele ishipambwi she uMlungu atubhilishiye kubhala kumwanya kwi dala ilya Yeesu Kilisiti. <sup>15</sup> Itwe twe tukulile mu lwitikho, tulisibhililaje liniilyo. Poope inga makusibha ishinji ku lyolyonti, uMlungu atibhasakulile liniilyo apazelu. <sup>16</sup> Heelo ilyinza nhaani ku kuti tujendeelele kulemeelela liila lye tulifishiye.

<sup>17</sup> Bhanholo bhaani mu lwitikho, mulandataje ishifwani shi njendo zyani inyinza na kumanyila ku bhaala bhe bhakulandata ishifwani shi njendo zye twabhalanjile. <sup>18</sup> Ine imbabhuzi-izye ziniizi akhinji bhulo. Ishi inkugalushila winza ku mansozi, kubhabhuzya kuti bhaliipo abhantu abhinji bhe bhakulolesya ku njendo zya bho kuti bhalugu bha shikhobhenhanyo sha Yeesu Kilisiti. <sup>19</sup> Uwumalilishilo wa bhantu bhanaabho ku kuyaga, umulungu waabho ku kwikusya inyanda zya bho. Bhakulola itogo kubhomba izyi nsoni, kabhili bhakusibha vwi vintu ivwa mu nsi. <sup>20</sup> Ileo itwe twe bhakhaaya bha kumwanya, tukumugulila nhaani uMuposhi witu, uMwene uYeesu Kilisiti, ayinze kufuma kumwanya. <sup>21</sup> Uweene akhayigalulanya amabhili gitu iga aga wudeganu, na kugabhiikha kuti gakholane nu mubhili waakwe uwa wumwamu. § Akhayibhomba shiniisho ku makha gaala ge akutabhaala ivintu vwonti.

## 4

### *Indajilo zya Paulo*

<sup>1</sup> Ishi bhanholo bhaani abhaganwa mu lwitikho, insambile nhaani kubhalola winza. Imwe mwe luseshelo lwani, kabhili mwe shipambwi sha lufuuyo lwani lwe inhayiposheela ku mbombo yaani. Bhaganwa bhaani, mwimiilile akhinza mu wupeeka wiinyu nu Mwene uYeesu.

---

§ 3:21 3:21 Bhaazya 1 Bhakolinso 15:42-57.

2 Inkumalamba uEwodiya nu Sintike kuti mwimvwanaje anza bhanholo mwa Mwene uYeesu. 3 Niiwe wamwitu umusunde, inkulaabha ubhaavwe abhantanda ibho, kunongwa ye bhanavwizye imbombo iya kulumbiilila iNtumi iNyinza izya Yeesu Kilisiti peeka niine. Bhaamile peeka nu Kilemensi, na bhanji bhaala bhe bhabhombile imbombo peeka niine. Bhonti bhanaabho amataawa gaabho gasimbiilwe mu shitaabu isha wuumi.\*

4 Museshelaje kubha peeka nu Mwene uYeesu insiku zyonti, khabhili inkuti museshelaje!

5 Mulolesyaje uwutonsu wiinyu ku bhantu bhonti, kunongwa ye uMwene uYeesu apalamiye kugalukha. 6 Mutayiyimvwaje ku lyolyonti, mamuraabhaje uMlungu na kusalifwa, vwe mukwanza vimanyishe kwa Mlungu. 7 Wooke uwutengaanu we wukufuma kwa Mlungu we wukushila injeele ya muntu wowonti, wutilindiilile amooyo giinyu ni nsibho zyinyu kunongwa ye mupatinhiine nu Yeesu Kilisiti.

8 Bhanholo bhaani ma lwitikho, inkumaliilizya kubhabhuzya kuti, mulemaje zye zya nalyoli, zye zikupaalwa, izya wugulosu, zye mfinjile, zye zikhondeeye, izya lushindikho, izyi togo, ni zya kupaalwa. 9 Mazibhombaje zyonti zye mwamanyiiye na kwitikha kufuma kukwani, zyonti zye mwazyimvwizye inkuzilonga na kulola

8 Bhanholo bhaani ma lwitikho, inkumaliilizya kubhabhuzya kuti, mulemaje zye zya nalyoli, zye zikupaalwa, izya wugulosu, zye mfinjile, zye zikhondeeye, izya lushindikho, izyi togo, ni zya kupaalwa. 9 Mazibhombaje zyonti zye mwamanyiiye na kwitikha kufuma kukwani, zyonti zye mwazyimvwizye inkuzilonga na kulola

---

\* **4:3** 4:3 Amataawa gaabho gasimbiilwe mu shitaabu isha wuumi kwe kuti ishitaabu she uMlungu asimbile amataawa aga Bhakilisiti bhe bhakupuuta izya nalyoli. Bhanaabho bhe bhakhayibha nu wuumi uwa wiila na wiila.

zye inhabhombaga. Wope uMulungu akuutupa uwutengaanu. Uweene atibhe peeka niimwe.

### *Insalifwo zya Paulo ku Bhafiliipi*

<sup>10</sup> Náamile nu luseshelo nhaani mwa Mwene uYeesu, we naalola kuti kuwamalilishilo, mwabha na khabhalilo winza akha kunaavwa. Intakuti mwaniwiilwe, lyoli mukhankumbukhaga insiku zyonti, ileelo mutáamile na khabhalilo akha kulolesya liniilyo. <sup>11</sup> Inkulonga shiniisho te kunongwa ye imbuliliilwe na khantu khamu, lyoli injilubhiziizye kukhobhokha na viila vwe indi navwo. <sup>12</sup> Imanyile kubhulilwa, na kubha ni vwinji. Injilubhiziizye kukhobhokha ku zyonti, kubha ni vwakulya awe kubha ni nzala, kubha ni vwinji awe kubhulilwa. <sup>13</sup> Ingakhola kubhomba zyonti ziniizyo kunongwa ye uKilisiti akumpa amakha. <sup>14</sup> Poope shiniisho, imwe mwabhombile akhinza, kunongwa ye mukhanavwaga mu khabhalilo khe náamile mu mayimba.

<sup>15</sup> Imwe muBhafiliipi mumanyile muneemwe kuti we inkwanda kulumbiilila iNtumi iN-yinza kukwinyu, we nasogola mu nsi iya mu Makedoniya, ishibanza shiinyu sheene she shanavwizye. <sup>16</sup> Poope akhabhalilo khe inhanzaga iwva kunaavwa we indi mu nhaaya iya mu Tesalonike mwandeteeye, kabhili te kheeka kheene, lyoli akhinji bhulo. <sup>17</sup> Te kuti inkwanza kuposheela kwene ivintu ivinji kukwinyu, lyoli inkwanza muposheele insayo zya Mulungu zye zikufumilana na she mukufumwa.

<sup>18</sup> Imposheleeye ivintu vwonti vwe mwámpiiye, khabhili vwinji kushila vwe inhanzaga. Ishi indi na vwonti kanongwa ye uEpafuladito ándeteeye ivintu vwinyu. Ivintu viniivi vwe mufumwizye, vili ngati mfinjile iya kulungulizya ye yikunshila akhinza, imfinjile ye yikwitishilwa na kumukhondezya uMulungu. <sup>19</sup> Ishi uMulungu waani atibhasenje kwi dala ilya kuubhapa vwonti vwe mubhuliliilwe, ku wudumbwe waakwe uwupiti kwi dala ilya Yeesu Kilisiti. <sup>20</sup> UMulungu, uTaata wiitu, ayimishilwaje, wiila na wiila! Zibhe shiniisho.

*Indamukho izya kumalilishizya*

<sup>21</sup> Inkubhalamukha abhafinjile bhonti abha Mulungu bhe bhakumwitikha uYeesu Kilisiti. Abhanholo bhitu mu lwitikho bhe bhali peeka niine ipa bhakubhalamukha. <sup>22</sup> Abhafinjile bhonti abha Mulungu bhe bhali ipa, inhaani bhaala bhe bhali mu nyumba ya Kaisaali, bhakubhalamukha mweni.

<sup>23</sup> Uwiila wa Mwene uYeesu Kilisiti wabhe peeka nimwe mweni.

**ULufingo uLupwa ku ndongo iya Shimalila  
Malila: ULufingo uLupwa ku ndongo iya Shimalila  
(New Testament+)**

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

3aa8e7a3-f258-5182-ab3f-fbc6f725bb06